

相城
就漢
景帝
元
藏本

吳醫彙講卷四目錄

沈受益

人身一小天地亦有南北兩極論

命門脈診辯

沈悅庭

治肝補脾論

沈實夫

四維相代陽氣乃竭解

膀胱者州都之官津液藏焉氣化則能出矣解

膀胱上口論

五苓散解

沈思劬

辯素問濁氣歸心之訛

周蘊石

祖氣論

連珠

計十首

吳醫彙講卷四

長洲唐大烈立三氏纂輯

門人倪士俊南吉氏校訂

沈受益

諱謙號牧菴儒而以醫聞縉紳先生常詩
 文往來當道亦多契合然非治病不輕入
 室生三子長筮舫業儒兼通醫學府庠歲
 貢生選卓雅集行世次悅庭考拔吏目以
 醫聞次詹所吳庠生地贈修職郎漂陽縣
 學教諭有友晉閣帖行世長孫旭岑芸齋
 並登科甲次箬幫國學生好醫未嘗釋卷
 而不臨證次丹山實夫暨曾孫思劬維祚
 俱業醫先生年六十四歲歿於
 雍正壬子世居葑溪烏鵲橋東

人身一小天地亦有南北兩極論

按周天三百六十五度四分度之一其間日月星辰之周流循環而不息者有南北兩極以爲樞紐二極居其所而衆星共之星動而極不動動主於靜也靈樞五十營篇曰人經脈上下左右前後二十八脈以應二十八宿一呼氣行三寸一吸氣行三寸一萬三千五百息氣行五十營於身水下百刻日行二十八宿漏水皆盡脈終矣夫人之營衛運行無極以統之焉得常周不休心主與命門卽人身之南極北極也心者神之舍也神藏不露而無爲五藏六府之運行

莫不以心爲君主故經言主明則下安主不明則十二官危心之元神卽天之南極也命門一點爲生氣之原藏於兩腎中間以爲十二經脈之根本必須鎖鑰閉固卽經所云陰平陽秘精氣乃治腎之元氣卽天之北極也天之南極入地三十六度而位乎南下爲陰而南爲陽居陰位之陽也人之心君位乎腹之上腹爲陰而上爲陽亦居陰位之陽天之北極出地三十六度而位乎北上爲陽而北爲陰居陽位之陰心入之命門位乎背之下背爲陽而下爲陰亦居陽

位之陰，天之二極對待以爲中樞而後運行不息。人之心君與命門亦必神氣相合而後營衛得以周流不息。顧靜者動之根也，心爲十二官之君主而主乎靜，定命門爲十二經脈之根本而主乎秘密，是卽兩極之居其所而不動也。

命門脈診辯

張景岳三焦胞絡命門辨云：命門爲陽氣之根，故隨三焦相火之脈同見於右尺。按命門居兩腎中間，卽人身之太極，乃陰陽之根底，旣爲陽氣之根，亦爲陰

氣之根景岳真陰論云命門之火謂之元氣命門之水謂之元精論理並無偏倚及至論及脈位則但將右尺以候陽氣之根將謂左尺不可以候陰氣之根乎將謂陰氣之根亦於右尺診之乎將謂命門但候元氣不必候其元精乎此景岳之偏於溫補其誤卽在於此所謂差之毫厘者也按命門原氣稟於有生之初得父母之兩神相合而化形如露珠之一滴升於丹鼎之上以爲生身立命之根天地陰陽五行之精亦卽妙合於是五臟六腑四肢百骸由此而生不

可以言水火并不可以言精氣乃精氣神三家會合而始成此一點莫可名言而曰命門指人身有生之根天之所命而名之左氏曰民受天地之中以生所謂命也此之謂歟命門一點藏於兩腎中間以運行陰陽之氣全藉腎中陽氣陰精以爲之養在有生以前則精氣生長於命門在有生以後則精氣之生於命門者命門反須精氣以養焉精氣不足猶可峻補以救之至精氣大傷而命門生氣之原絕則非補精氣之所能挽回故言至水火精氣已屬腎陰腎陽而

非命門矣夫命門爲生氣之原非特右尺不能候卽
兩尺亦不能候且六部俱不能候是當以難經爲斷
也八難曰十二經脈者皆係於生氣之原所謂生氣
之原者謂十二經之根本也謂腎間動氣此五藏六
腑之本十二經脈之根呼吸之門三焦之原一名守
邪之神故氣者人之根本也根絕則莖葉枯矣寸口
脈平而死者生氣絕於內也獨是一難獨取寸口以
決死生而八難言寸口脈平亦死是何其自相悖謬
乎蓋寸口爲脈之大會可決死生乃穀氣之變見後

天有形之可脈也生氣之原絕則寸口脈平猶死乃
元神之聚散先天無形之不可脈也然則命門之絕
將不可脈之而已乎經曰望而知之謂之神在醫者
之以神照神乃神聖之能事誠非下士之所能窺測
而以右尺爲診則固知其非也

沈悅庭

諱卓士號越亭受益先生次子年五十二歲歿於乾隆壬申餘詳受益公下所遺此

稿今令姪箬邦暨姪孫思劬維祥協祥付梓

治肝補脾論

金匱論治肝補脾肝虛則用此法此指肝之陽虛而言非指肝之陰虛火旺而言也肝陽虛而不能土升則胃乏生發之氣脾無健運之力而水無土制腎水之陰寒得以上制心陽周身陰盛陽衰而純乎降令則肺陰之金氣盛行肝陽之生氣愈病矣必得補土之陽以制腎水之陰寒則心陽無水以尅而火盛火

盛則肺金陰氣不行不至陰肅降令從右行左以傷
發生之氣則肝木之陽氣自必暢茂條達矣右方用
逍遙散治木鬱土中以宣陽氣是肝木陽虛而用治
肝補脾之法者也乃後人用以治陰虛火旺之肝病
則以升令之太過者而復升之宜其有升無降而至
厥逆矣蓋一陰一陽可不明辨哉其治陰虛火旺之
肝病如血虛宜滋水虛則補其母也火旺則苦泄實
則瀉其子也氣升上逆則降氣以金制水也其與治
肝補脾之法正相反豈可混治耶

沈實夫

名果之號楠園受益孫笠舫子悅庭姪國學生輯醫學希賢錄十卷未梓年四十七

歲歿於乾隆乙巳所遺此稿今令嗣維祥協祥付梓維祥名家熊協祥名家罷

四維相代陽氣乃竭解

按王太僕註四維爲血肉筋骨吳鶴臯註四維爲血脈筋骨以是四者維持一身以註維字之義馬元臺以血脈筋骨於四字未妥因註四維爲四肢汪訥菴以王註之血肉筋骨馬註之四肢俱於代字無着因註四維爲四時諸說紛紜不一顧四肢腫而愈者甚多未可便云陽氣乃竭至血脈筋骨及四時之說又

腫病中從未論及竊思四維之見素問者屢矣氣交
變大論曰土不及四維有埃雲潤澤之化則春有鳴
條鼓折之政五常政大論曰其雩四維故王註以四
維爲東南西南東北西北之位也及後世馬元臺吳
鶴臯等註此二篇之四維亦俱宗王註四隅方位而
說是四維當作四隅解一定而不移矣四維相代當
作人身之四隅解亦無疑矣蓋言腫之起於前後左
右者自此至彼一身盡腫陽氣乃壞極而無存矣四
隅盡腫者卽臍突背平缺盆平足心平之類是也丹

溪以此二句爲衍文此求其說而不得從而爲之辭亦不知爲不知之義也但無此二句則語氣未全且於義理亦未周足至汪詵菴以陽氣乃竭之竭字作壞字未知本於何人竭之與壞其義不甚遠姑置不

論

膀胱者州都之官津液藏焉氣化則能出矣解王太僕註曰得氣海之氣施化則溲便注泄氣海之氣不及則閼隱不通故曰氣化則能出矣王太僕爲註釋之開山宋元明歷代諸家各仍其說莫不以津

液卽爲溲便殊不思氣化則能出者言膀胱之津液
得太陽之氣而後能出於皮毛非津液下出之謂也
且津自津液自液小便自小便逐字考之內經各有
明文靈樞決氣篇曰腠理開泄汗出溲溲是謂津穀
入氣滿淖澤注於骨骨屬屈伸洩澤補益腦髓皮膚
潤澤是謂液又曰津脫者腠理開汗大泄骨屬屈伸
不利又五癰津液別篇曰三焦出氣以溫肌肉充皮
膚爲津其流而不行者爲液是經文津液二字各有
着實註解者不得以津液小便混而莫辨矣自古以

來接內經之統以繼往開來者其惟仲景先師傷寒
論乎其治太陽病無汗用麻黃湯有汗用桂枝湯此
津藏於膀胱氣化則能出之一證也金匱用栝萸桂
枝湯以治柔痙葛根湯以治剛痙因邪傷太陽液不
養筋故助太陽之氣化以運行於皮毛以流通津液
則筋脈得以濡潤此液藏於膀胱氣化則能出之又
一證也以經註經已甚明矣而仲景治法又與經旨
符合則津液之非小便尚何疑哉又水飲入於胃上
升於肺以下布於三焦者謂之水水濕壅而不通則

小便不利輕爲腹膨重爲腫脹此水在三焦而未入膀胱者也其既入膀胱以後水之上升而汗出溱溱者謂之津所謂下輸膀胱水精四布也貯於膀胱而下出者則謂之溺溺孔閉澹則爲癰秘內經之胞痺等症是也素問宣明五氣篇曰聘胱不利爲癰不約爲遺溺靈樞本輸篇曰實則閉癰府則遺溺經脈篇曰肝所生病者遺溺閉癰又曰足少陰實則閉癰竊意三焦不能化入膀胱者其病多虛故歷來怡水腫水脹者總以氣不化水爲主也因溺竅不通膀胱之

內水脹者其病多實故統觀內經諸篇癰閉則皆有實而無虛也又按津之外出者爲汗津之內出者爲溺故汗多不得利小便恐陰從下脫也失小便者亦不得發汗慮其陽從上脫也小便之與汗俱爲津之所化是同出而異名者也液爲水穀之精華卽津之流而不行隨氣以運於周身則潤皮膚澤筋骨補腦髓聚於膀胱布於經絡宜藏而不宜出故十二官之神明等俱言出而此獨曰藏者言津之液藏也氣化則能出者但可指津而言也若液從溺竅而出則爲

膏淋等症矣尚得謂之氣化哉

膀胱上口論

膀胱上口靈素未言有無後世聚訟紛紜或言有上口而無下口者乃以氣化則能出之句而誤會也若無下口焉得氣一化則遂若此通利哉是無下口之說不必論矣或言有下口而無上口者張景岳李士材俱主是說因景岳士材之書近世風行海內故人皆以爲無上口矣第無上口則交腸之易位而出者糞從何處入於膀胱乎張三錫以爲上下俱有口者

是矣但語焉而未詳也夫水道既從小腸下口以入膀胱則清濁不分者何獨併於大腸之水瀉人所常有而糞入膀胱之交腸患者甚少乎諦思其故必係膀胱有上口而常閉乃爲平人之常水之入於膀胱者仍是三焦化入而非從上口以入者也或腑氣大虛則力乏而竅不能閉或邪熱傷腑則熱主開泄而竅亦不能閉以致糞從小腸下口入於膀胱上口並隨小便而出矣譬如人身之外竅亦有常閉而不通者臍孔與兩耳兩乳無故則常閉而不開有故則或

出膿血或通乳汁膀胱之上口亦可以類推矣世人皆以爲無上口者一則宗景岳士材之書一則見獸脬之止有下口也不思天地之生物各有不同者如毛蟲則五臟俱全羽蟲則無肺而無前陰卽人身亦有不同者男子肋骨二十有四女子肋骨二十有八男子頭骨八塊女子頭骨六塊人與人尚有異焉人與獸豈無異乎

五苓散解

此治小便不利之主方乃治三焦水道而非太陽藥

也素問經脈別論曰飲食入胃游溢精氣土輸於脾
脾氣散精上歸於肺通調水道下輸膀胱水精四布
五經並行此方用桂以助命門之火是釜底加薪而
後胃中之精氣上騰再用白朮健脾以轉輸於肺而
後用二苓澤瀉運水道之升已而降其先升後降之
法與內經之旨滴滴歸源復與太陽何涉傷寒論治
小便不利汗出而渴者五苓散主之不渴者茯苓甘
草湯主之蓋渴爲陽氣不足水不上升也不升則不
降故用肉桂以升之二苓澤瀉以降之而用白朮一

吳醫彙註 卷四
味以爲中樞乃註者莫不以渴爲熱入膀胱津液被劫所致如果熱入而復用桂朮以溫液耗津又二苓澤瀉以滲之是熱之又熱耗之又耗速之斃矣且不渴者反不用五苓而用茯苓甘草湯可知不渴則無需桂朮之蒸騰津液而桂朮之非治太陽而治三焦更不待言矣有小便不通而以桂枝易桂者此必命門之火未衰而外有太陽表症因邪傷太陽傳入三焦故表邪未解而三焦之水道不利卽傷寒論所謂中風發熱六七日不解而煩有表裏證渴欲飲水水

入則吐者名曰水逆五苓散主之是也表症爲太陽
不足故用桂枝以宣陽氣通津液於周身卽經文水
精四布五經並行之旨非用之以通水道下出也裏
症爲三焦之氣化不宜故用二苓朮瀉以通三焦之
閉塞非開膀胱之溺竅也夫下焦之氣化不宜則腹
膨而小便不利水蓄膀胱此乃水蓄於膀胱之外不
能化入膀胱故用五苓以化之亦有用桂枝而効者
因衛出下焦助太陽氣化以運之非爲太陽腑內之
水蓄也如三焦旣將水氣運化入於膀胱而不出此

真太陽府內痺而不宜卽胞痺症也素問痺論曰胞
痺者少腹膀胱按之內痛若沃以湯澁於小便上爲
清涕水在膀胱之內是膀胱脹滿而非腹脹故按之
內痛若沃以湯其溺孔之道痺而不通故澁於小便
膀胱痺氣隨太陽經脈之行以從巔入腦故上爲清
涕此真太陽本府水結膀胱之內而非腹中膨脹之
小便不利也總之水入膀胱之內方屬太陽若水在
膀胱之外腹膨滿而小水不利者此臟腑之外軀殼
之內三焦主之虞天民曰三焦者指腔子而言也故

治腹滿腫脹之症設使一味利水則三焦之氣更不能施化而膀胱津液爲之下竭非仲景五苓之意也

沈思劬

名家瑗號小隈受益曾孫
受業於叔實夫得其傳

辨素問濁氣歸心之訛

讀素問至食氣入胃濁氣歸心淫精於脈節此濁氣
歸心不得其解因思心者君主之官神明出焉如果
濁氣歸心焉得虛靈不昧具衆理而應萬事乎按此
心字必因千百年相傳之書脾字誤爲心字考靈樞
陰陽清濁篇曰受穀者濁受氣者清又曰營者水穀
之精氣也調和於五臟灑陳於六腑又曰陰清而陽
濁又曰諸陰皆清足太陰獨受其濁夫腑爲陽臟爲

陰既日諸陰皆清則心之受清可知既日足太陰獨
受其濁則濁氣歸脾之外更無一臟再受其濁可知
是濁氣歸脾經文無不印合竊以爲一字之訛敢以
質諸高明

周蘊石

諱邦彥別字璞園
居葑溪吳衙場

祖氣論

夫綱緼鼓蕩於天地之間者孰推行是孰發育是無
非一氣爲之橐籥而已天以五行化生萬物人以五
臟應之天一水也故兩腎爲先天之本天五土也故
脾胃爲後天所資此東垣丹溪之論後人皆起而宗
之至汪氏苓友獨主一心其言曰萬病皆起於心五
臟六腑皆系於心天有日則晝夜分四時序萬物生
世有君則尊卑定貴賤明兆姓治心者君主之官也

在天以日爲主在人以心爲主論凡數萬言直與前
賢鼎立其嘉惠來茲豈淺鮮哉特是三家之說一指
脾一指腎一指心則猶是以有形之臟體言也夫氣
者形之本也人自賦形以後陽曰氣陰曰血而先天
無形之氣則宰乎陰陽血氣之先修養家謂之祖氣
卽天地生生之氣也緯書之言曰有生皆在氣中凡
夫負陰抱陽昆蟲草木之屬莫不感此氣而生故氣
在則形存氣去則形壞孔子曰純子食於其死母者
少焉朐若皆棄之而走所愛其母者非愛其形也愛

使其形者也使其形者何也氣也生氣通天論曰蒼天之氣清淨則志意治順之則陽氣固又曰服天氣而通神明靈素之言汪洋浩瀚其要旨止歸一氣字夫涕唾津精汗血液七般靈物皆屬陰陰者死質也氣者生陽也方書中往往以血肉有情爲煉石補天之具不知吾身中生陽之氣旣若存而若亡則此塊然者亦漸鄰于朽腐之鄉乃反恃此物之朽腐者以却病延年不其難乎是故治形必先治氣形特氣之宮城治氣必先治心心實氣之主宰先天之植此形

者惟氣後天之帥此氣者惟心斗柄招太陽徑寸混
三才三奇論之祖氣卽子輿氏之言養氣求放心也
古人云行醫不識氣治病從何據蓋無此冲和不息
之氣則心何由而藏神脾何由而載物腎何由而爲
蟄藏之本經曰知其要者一言而終其斯之謂歟

連珠

連珠之作肇自漢章之世義取貫珠文多假
喻節短而韻長言近而旨遠蓋詞賦之流派
也前賢葛稚川論醫用連珠文今倣其體

蓋聞天動星迴而辰極居其所璣旋輪轉而衡軸執
其中是以位定坎離握樞紐於南北緯纏卯酉分升
降於西東

蓋聞水障於土還以潰其土火生於木仍自焚其木
是以植千章之嘉樹必溉清渠築百丈之脩堤先疏
支瀆

蓋聞漏滴銅壺水滑必迅灰傳葭管氣至斯飛是以
虧天一之真脉行必速于常度定甲乙之候節令每
決於先幾

蓋聞熱獸炭之盈爐煖勝三春而不能代燭龍之照
焚蘭缸之寸燼光逾四壁而不能代暘谷之暄是以
鏡本非臺君以名而離精獨炳薪傳有火相以位而
泉水常溫名字借用王氏註

蓋聞陽爲陰逼不走卽飛陰遇陽消非枯則槁是以
蟄雷之性激以暴雨而勃升旱魃之災沛乎甘霖而
却掃

蓋聞蝨處頭而黑麝食柏而香頸依嶮而瘦齒居晉
而黃是以漸染深而變質方宜之異服用久而增氣

物化之常

蓋聞鰲山之燈名走馬旋轉于點火之光西洋之鐘
號自鳴循環於周天之度是以桃梗土偶形本氣而
運行肝丑肺寅經隨時而流注

蓋聞機引桔槔不敵尾閭之洩戕從萌蘖何假甘露
之滋是以叅同契之金華難填慾海悟真篇之首經
詎起枯枝

蓋聞樹合歡于繡閣不怡思婦之顏栽萱草於蘭庭
無解愁城之織是以七情相倚針石何施五欲交攻


身醫身言
卷四
刀圭莫塞

蓋聞朔雪嚴風不解燎原之熱流金爍石難迴冰室
之涼是以五方之里攸分性殊寒燠六氣之中異所
臧別陰陽

吳醫彙講

卷五
五
六
七





吳醫彙講卷五目錄

薛鶴山

痘毒藏脾經說

痘出同時論

痘由太陰轉屬陽明論

題費建中救偏瑣言

迴瀾論

葵萊預解痘毒說

薛公望

擬張令韶傷寒直解辨症歌

辨表分寒熱

辨表分虛寒虛熱

辨裏寒裏熱

辨裏虛寒裏虛熱

辨假虛寒假虛熱

辨渴

辨舌

辨虛寒舌燥 實熱舌燥

辨寒頭痛 熱頭痛 虛頭痛

辨風寒骨痛 虛骨痛

辨虛寒腹滿 實熱腹滿

辨虛寒不大便 實熱不大便

辨小便不通

辨嘔

辨吐衄

辨汗

辨譫妄

辨五目緣

辨面目赤

辨下利

辨厥

辨腹痛

辨脈脫

吳醫彙講卷五

長洲唐大烈立三氏纂輯

門人顧英沅芳氏校訂

薛鶴山

名景福號松莊世居長春里王百穀紅梅閣舊址闢有春熙堂春兩樓泊乎晚年灌杞藝菊日與門弟子講貫經史百家著杞菊廬記自樂天真年六十有九子一名承基字公望趨承家學焉

痘毒藏脾經說

痘之毒當由姪婦飲食中得來曾見伍氏痘科論毒藏脾經云飲食氣味屬濕濕本從脾胎孕賴脾氣生

養母脾氣有濕熱襲於子之脾經猶豆種土中非時則寂然不動必待陽氣外鼓萌芽內生然後苗而秀秀而實矣且物入水則腐入木則蠹入火則焚金堅不容物惟土受物則可久又能植物又能生實也按此論最爲有識其云痘毒藏脾祇是太陰經氣有未純處毒字亦勿太泥卽此知古人保嬰用拭口法及硃蜜等方逐下穢糞亦非不見到者命門藏毒之說從此無容印定矣

痘出同時論

痘本天瘡其始也無不因天時驟暖氣從外洩濕熱
乃蒸而爲痘譬如大人病春溫同一自內達外之象
所以溫病禁汗下痘瘡亦禁汗下病痘者多則痘氣
薰蒸飄泊遠近天氣通於鼻橐籥相感引動而出故
證候相同而亦各隨其人之體氣爲變動治法以和
其陰陽爲主而升發尤爲喫緊蓋諸瘡屬火火鬱則
發沉氣從鼻入在上者尤宜引而越之若毒厲深重
必直行膜原擾動三焦與素有之濕熱兩相搏激阻
遏氣機則當如喻嘉言論疫之法上焦如霧升而逐

之兼以解毒中焦如漚疏而逐之兼以解毒下焦如
瀆決而逐之兼以解毒乃爲調劑無誤榮衛得通痘
出自順務宜先達其邪而後聽其元氣之收發拓之
歛之貴在行所無事而已蓋痘雖本胎中濕熱然爲
毒皆不甚重惟穢惡之氣乘內氣不實而潛入者痘
發乃密今種痘之法盛行而選苗不善易涉險候其
明驗也故毒重者須分別三焦以逐其邪卽宜照顧
中氣以扶其正但云見痘治痘急於清解無惑乎輿
尸而歸矣至於必先歲氣無伐天和道理極變通極

精微內經至真要大論詳列司天在泉間氣主客勝復之治法最難執一非子午火燥治皆清潤丑未濕寒治皆溫補之謂也苟能於陰陽表裏虛實寒熱標本先後之間因病施治卽於歲氣天和之道無不合矣

痘由太陰轉屬陽明論

疹屬肺而達於皮毛從太陽而洩痘屬脾而達於肌肉從陽明而透其宜於溫補者大陰虛寒也異攻保元所以得效其宜於涼瀉者陽明鬱熱也承氣白虎

所以致勝祇因由內達外激動真氣症候似旁涉五臟非相傳也傷寒邪自表入痘瘡毒自裏出毒由太陰轉屬陽明土爲萬物所歸無所復傳灌漿收靨計日可愈故順者能自出者也險者欲出而不能自出者也逆者不得出者也然則痘瘡之首尾重陽明一經從可知矣胃爲十二經之海氣血俱多外鄰太陽爲之閤闢自能領毒出戶鼓清陽而上升務使毒火透出肌肉夫然而內火得化膿之灌漿之養何莫非陽明融化之功乎卽如升麻葛根湯古人以爲首尾

可用深得鼓舞陽明之旨若妄執解毒之說承氣入胃切盡真陰白虎下咽鏟盡元陽中土一餒後天本撥矣明者必計不出此

題費建中救偏瑣言

是書也今人家置一編而究竟解悟者亦少夫既云救偏原爲爾時偏尚溫補者說法集中雖虛實並舉而虛症作賓意以人所共知者不妨從畧也實症作主意以人所未悉者不嫌縷述也苟順口念去眼光都注定實火一邊直以痘爲有實無虛矣又每條詳

載治驗全以大黃石膏等收功然其詳述病情處甚明無一症非身熱如火躁亂異常口膩如脂者夫身熱而日如火陽明熱盛也躁亂而日異常三陽熱極也口燥咽乾亦少陰中急用承氣湯症也建中治法原自中窾况所述痘點不日形色紫黯卽日按之板實可知脈象亦必滑數實大實火有餘於茲可悟然則表症苟非壯熱之極內症苟非躁亂之極咽中苟非乾燥之極痘粒苟非紫黯板實之極脈象苟非滑數實大之極者斷不宜叅用大黃石膏等藥矣建中

未始非錚錚者卽所著瑣言亦一片婆心情語意太
責重熱毒治驗復多誇蕩滌且又雜撰覆釜鱗座及
游蠶疊錢諸名目槩用寒涼攻發全不顧慮氣血和
其陰陽俾灌漿周浹以偏救偏語刺刺不能休使無
識者奉爲指歸更無隅反則建中與有罪焉嘗考吳
又可論治疫而及痘症專以承氣爲制勝之法且云
諸家論痘從未言及但知揚湯止沸不思釜底抽薪
則古來小兒不死於正命者多矣此論嘗爲建中開
山之祖顧下奪之法雖不可偏廢祇是全體中一隅

古人如萬密齋最久吾方書何嘗無三一承氣湯桂
枝大黃湯敗毒和中飲等法只取數語該括救偏全
部其餘按症列方變化生心未嘗印定後人眼目也
效密齋久吾不得當不失爲中醫刻鵠不成尚類鷺
焉效又可建中不得必致殺人無筭矣卽又可著瘟
疫論時因明季辛巳壬午之疫起見而喻嘉言寓意
草又言辛巳壬午時疫盛行道殣相望各處醫者發
汗和中藥內惟用人參多以活人更有發斑一症最
毒惟用人參入消癘藥內全活者多由此觀之南昌

去蘇郡雖遠或症治自當不同然安知喻氏所謂活者入又可手而不誤藥耶著書垂後爲萬世計也病變何常而師心自用據目前得効之方自詡爲不易之法多見其不知量耳

迴瀾論

痘瘡關係生死非精於內經傷寒論者不能療一有專門則局量不闊識見不廣沿流而昧其源此道遂絕卽如建中濫觴釀成今日之倒懸究其變本加厲之故因見痘初起血有熱駭爲毒火峻用苦寒逆折

在爾時火勢勃勃欲出雖經冰伏尚相持不下不致
入口卽斃醫者遂信爲用熟無碍於是氣機鬱遏紅
暈轉深倍增煩熱益共信爲血熱毒重恣用寒涼以
誤傳誤其弊一也遇真險症卽作危言斷以不治而
按日處方尤害在手口相應到得送終病家不咎其
手法之辣轉贊其眼力之高醫者益膠膠自負無復
變計斷決愈精聲名鵲起其弊二也病家樂聞清解
之說婦媼嘈嘈總以瀉食積降火毒爲第一着苟不
迎合其意卽使收功後稍有咳嗽及痊癒尚認爲未

曾解毒所致歸咎前醫其或過十餘朝諸法並窮不
得已加人參入清攻藥中爲江心補漏徒見氣喘胃
高死後心頭猶熱無識者益悔用補之誤視同醜砒
時醫深於世故務求不失人情其弊三也刻板方治
通國皆然稍有異同便無聲援入附出污顯成時局
彼此互薦方同一律成固可以居功敗亦可告無罪
醫道之行惟此爲嚆矢矣彼惟急於道之行寧復知
其術之謬況箕裘如是衣鉢如是數頁方書錦囊具
在眼光本不盈尺咫更無從叅悟靈機其弊四也具

此諸弊種種相因襁褓何知遭此巨劫謹披肝胆吐
心腹而告諸爲人父母者曰順痘本無不生之症而
誤藥轉有致死之因險痘極有可生之路而誤藥必
無不死之倖逆痘尚有求生之法而誤藥反爲速死
之方與其誤藥毋寧不藥年來痘疹甚行比戶哭聲
順而死者猶十之三險而死者已十之七幸而獲愈
者非痘出極稀卽貧家無力延醫或兒性倔強滴藥
不肯沾唇否則藥雖下咽立卽嘔出如有神助求其
因藥而愈者百不獲一也曾有一幼醫之女痘殤哭

甚哀余笑謂之曰君當取左傳語自爲懺悔因朗誦
余殺人子多矣能無及此乎嗟嗟余豈好爲詬病哉
亦思稍挽狂瀾爲嬰兒開一線生路耳苟能明不服
藥爲中醫之訓則全活已過半矣況由內經傷寒論
而精之者哉

葵菜預解痘毒說

預解痘毒萬氏有代天宣化丸但可預防天行究於
內毒無涉若餌硃砂珍珠黃連犀角兔血鶴卵之屬
總因視爲慾火之毒故專入少陰方雖新奇試多無

身醫彙言 卷五
効或塗草蔴膏浴鱧魚湯欲提毒出外亦取末舍本
余究心格致獨主毒襲脾經之說又得松槃山人筆
記詳言葵菜解毒之驗按葵性涼滑入脾清濕熱有
功喜其言之信而有徵也今附載於後

葵一名甜菜一名女菜一名滑菜一名荇蓬蓋百
菜之主也四時可種爲蔬秋種者更佳故冬葵子
尤爲藥品所尚嘗閱本草綱目李氏開載葵菜之
功萬不失一而歷代流傳疑信相半遂從菜部改
入草部且因葵性寒滑恐傷脾胃不敢輕試遂令

對病妙藥棄置不用而惡毒流染坐致痿頓心甚傷之久有此疑無從辨識十數年間廣詢博訪乃知爲甜菜無疑間令童稚餌之雖無傷害而功效未顯未敢輕傳比年以來數經此症盛行見不治者十有八九而嘗食此菜者百無一失乃知相傳之訛致神功之久湮也可勝慨哉方敢形之諸著以廣其傳嗟乎因慎重而坐令陸沉因未廣而猶然胥溺失今不傳後悔奚及乃開列其方以公諸天下後世蓋其寒滑者性也洩利者毒也與脾胃

根本何與且未病而先藥病受之病去本完最爲
上策卽見點而後食猶將收大半之功不猶愈於
坐火觀薪者乎又豈若俗醫見危迫輒進芩連慘
均割刃者乎噫是在信不信試不試之間耳安敢
以人命爲等閑而冀其必售乎其法采此菜熟之
以供蔬食愈久愈佳余所爲懇懇欸欸祈人之必
信必傳者聊以道逋慢之愆而爲不可復生者志
痛耳余何慕焉天啓乙丑歲三月吉旦慈溪松槃

山人姜應麟筆記

薛公望

名承基號性天鶴
山子世居長春里

擬張令韶傷寒直解辨證歌

辨表分寒熱

先提清表分

晝夜頭疼渾不了身熱脈浮邪在表病症看來似一

點出眉目

般表寒表熱須分曉或有汗或無汗汗少汗多且莫

是最當着眼處

管只就脈浮中分出兩條線表寒浮緊或兼弦表熱

以下旁証之

浮數兮或兼滑長與弦緩寒者身疼慣怕寒頻求衣

被遮溫煖熱者雖然也畏風無風便欲開帷幔寒不

渴兮熱或渴寒舌白苔熱黃澤寒者口和熱口苦寒

減食兮熱能食表寒散以辛溫味表熱辛涼非一例

表寒切勿先消食惟恐引邪入裏去表熱切忌是辛

溫變成燥熱為難治

辨表分虛寒虛熱

頭痛脈浮表也或兼大兼弦虛也按無力表分虛同寒熱別表

若虛寒必惡寒屢進辛溫汗難出若用辛涼必致汗多而近于亡陽矣

氣擾翻教身體麻或大熱兮或微熱胸前微滿且欲

此下言辛溫之後變象

嘔口淡或渴或不渴表如虛熱口亦淡必兼微渴思

此下是服辛涼後變象

潤澤服過辛涼身反痛舌形定現微苔色不論大汗

與無汗但查熱勢加猖獗兩症皆須補益來寒加姜

桂宜用桂枝湯加芪朮甚則加人參乾炮姜之類如血虛無汗可加當歸紅花和其陰血熱苓

柴宜柴苓歸芍芪朮之類甚則加人參

辨裏寒

五字是表證

裏寒脈沉緊或兼緩與遲惡寒骨節痛表症似而非

胸腹滿痛且欲嘔或吐或利俱有諸或熱或不熱手

足指冷厥喉有冷涎苔白滑或如猪腰或茶褐此宜
桂枝湯去芍加乾姜裏寒溫補是良方甚則加桂附
可以復其陽

辨裏熱

主腦

裏熱脈沉數或緩滑以長無論其神昏與清無論其
身熱與涼唇焦齒黑讖語現舌短苔黑或起芒裂破
出血反不渴或渴飲冷小溲長或利清水或便鞭聲
音洪厲力氣強狂發登高棄衣走否且循衣而摸牀

面目或赤或不赤其色垢濁如薰黃此宜芩連石膏
即不赤亦面垢
類甚則芒硝與大黃

辨裏虛寒

主腦

裏若虛寒者脈必沉而緩微細按無神救之惟愁晚
手足常四逆面色青黑黯渴而不欲飲但覺口中淡
惟喜極熱湯稍解胸中滿或嘔或吐或下利或不大
便心下悸心煩喜躁不思食蹠臥恍惚每獨語舌帶
淡黑色或如猪腰或糙米或白苔而潤或無苔而燥

吳醫彙言 卷五
短縮不能伸望之萎且槁理中四逆急溫之否則神昏汗脫了

辨裏虛熱

主腦

欲知裏虛熱脈沉而數按無力身熱退不淨口渴神恍惚與湯則飲之不與亦不討有時思食來食到便先飽舌上畧覺燥得湯燥卽好或有微苔或無苔或淡紅色如桃腮此爲裏分少津液瀉心導赤佐生脈

辨假虛寒

脈沉細兮或緩長出則遲兮入則疾或伏筋骨按有力口中不渴舌燥短不但身涼且四逆神昏譫語口目動狀若驚風作瘛厥或利清水或不便解下或如爛桃色人事不知歌且哭身輕偏自能起立或吐蚘垂口苦辣小便行時長且赤此是虛寒假症現應須解毒和涼膈

辨假實熱

主腦

脈弦而大或洪數無奈按之全不見任他熱勢如燎

大証據

原真底實板已先現苔白或黑短不燥或如猪腰或
米糲面目俱赤爲戴陽謔語發狂手足躁或有汗兮
或無汗坐卧只求井中蹈舌腫唇焦齒出血渴飲湯
水常不絕內是真寒外假熱理中八味合生脉煎成
冷飲代茶湯庶幾虛火歸源得誤用芩連增躁渴變
死庸師到此休饒舌

辨渴

主腦

渴症須分寒與熱熱者脉數而口苦身熱汗出喜冷

大証據

飲或兼湯水百杯可此宜花粉與川連加味叅同伴

腦

白虎虛寒而渴者脉必細兼遲即教洪且大終是數

大証據

而虛渴喜極熱湯稍溫便嫌冷有時思得水仍復不

者服

能飲此宜生脉中姜附辛以潤又有汗下之後亡津

液生津之品始為得不宜涼藥不宜溫何況諸多辛

與熱

辨舌

胃氣現於舌上有淡白苔俗醫漫消食必致光無胎

調理到思食苔白漸生來君不見病有厚苔滿舌者

忽然退去光而燥乃為胃氣絕之徵從此叅詳便分

曉又有大紅舌色無苔者君火之色浮於外盛極將

衰欲化灰

無病之人亦常有之宜用附子

引火歸源纔得退

舌色純紅必腎

氣素虛之人無他症而忽現此舌者用附子引火歸源固合又若敖氏傷寒金鏡錄載純紅為將瘧舌乃熱畜于內而病將發也不問何經宜用透頂清神散搐鼻法亦不可不知

又有舌黑如淡

墨更不須分燥與濕摠歸腎水克心火陰盛陽衰須

早識除非黑起芒刺燥而裂陽邪熱結何消說

辨虛寒舌燥

舌燥有多般或淡黃或淡白或起微刺或灰色更有

望之如燥捫之澤其色或紫而或黑必兼吐利而厥

逆神昏譫語詞蹇澀

舌燥而語言不清因燥而不清可治舌潤而語言不清所謂口

雖欲言舌不脈形微細定如絲或雖洪大終無力急

用生脉以養津附姜苓草和茂木

俗醫謂五味味厚多則用十餘粒少

則七八粒此不通之論必須鑊餘方効

辨實熱舌燥

實熱舌燥先有地或黃或黑起芒刺即使苔輕偏破
裂必兼身熱焦唇齒渴喜飲冷面目赤並無吐利與
厥逆讖語便閉諸症現洪數滑長脉可驗白虎承氣
隨變換

辨寒頭痛

王腦

大証據

寒頭痛脉浮而緊或弦或沉更兼遲惡風與寒四肢
冷頭喜熱物包裹之更有劉河間論頭痛屬熱者亦
惡寒喜熱緣熱爲寒閉則其痛
甚熱氣流通則痛止也然止後必
復作而益甚爲驗脉亦必有異理中參入桂天麻

附子細辛重者加少佐羌防法亦精

辨熱頭痛

熱頭痛脉浮而數或滑而長亦有諸口苦舌乾渴飲

大証據

飲痛連風府與風池惡熱其常惡風暫此爲風熱症

已顯羌防柴葛連翹苓甚則石膏用之驗

辨虛頭痛

主腦

虛頭痛脉弦而大弦則爲寒大則虛痛極不堪喜得

大証據

按日夜呼叫語聲嘶其痛或專在額上遍頭皆痛亦

有之急宜參苓芪朮加附子此症失治危即死

辨風寒骨痛

主腦

大証據

風寒骨痛脉弦緊或遲而緩亦有準身熱惡寒手足
冷舌上白苔口不渴拘攣遍體痠難忍甚則上嘔下
利併桂枝湯內用天麻有濕去芍加附穩

辨虛骨痛

主腦

脉弦而大數無力或發熱兮或不熱惡風兮拘急口
淡兮神思恍惚痛在骨節兮服發散藥而痛愈劇此

大証據

神氣傷也合用桂枝與芩朮大凡人身諸骨節其數
三百有六十是神氣之所遊行而出入君不見仲景
新加湯重用參姜以復陽

辨虛寒腹滿

出內經

主腦

藏寒生滿病脉遲緩兮或沉緊或虛大兮按無力腹

証據出金匱

滿時減減又甚不欲食兮食即嘔或泄瀉惡寒兮而
渴喜熱飲姜桂香砂溫散之不應再加參朮芩

辨實熱腹滿

脉沉而實主腦兮或滑與長兼腹滿不減兮減亦不足言証據 二句出金匱

大便雖解而不暢兮或得解而少寬滿腹硬痛不可

按兮無吐暈等虛症之相叅此宜枳朴以消之甚則

加大黃叅其間

辨虛寒不大便

疑案

大便不通羣呼熱不知寒凝亦斂結腹不滿兮口不

定案

渴白滑胎兮弦緊脉此屬虛寒無浪攻照常飲食且

從容切不遲之一二十日後溫補足時氣自通可餓

辨實熱不大便

主腦

証據

脈數有力長滑甚煩渴腹滿按之硬或潮熱兮食即

脹時有濁氣從後逆此為胃熱宜下之一有虛症須

細審

大約實症一下即愈一有虛症便須細審即必當下者亦只用涼膈以微利之解毒以和之陶

氏黃龍湯以補而下之

辨小便不通

小便不通分虛實虛則三焦失其職屢經利水不相

合此宜金匱腎氣丸治其三焦決瀆官象牙生煎服

亦安實者人素強或好食熱物肺熱不能通水道以

致膀胱成熱結宜用猪苓澤瀉梔滑石用後仍不効

須向膀胱尋外竅經說毫毛是其應經曰三焦膀胱者腠理毫毛其

應是三焦主腠理膀胱主毫毛膀胱有出竅而無入

竅濟泌別汁而滲入于膀胱者也毫毛是其外竅譬

如水注塞其上竅則水不能出矣如人不虛利小水

而仍不通者宜發其汗外竅通而內竅亦通此所謂

開鬼門也改從發汗最爲妙又有動其胞中血虛寒實熱

隨症別虛寒便溫補熱則清熱而養血因症施方不

可執

辨嘔

審因

証據

其人受暴寒或食生冷物吐酸并乾嘔平胃正氣合

主腦

証據

脉滑胃有餘飲冷不喜熱服溫熱藥嘔愈甚黃連竹

主腦

茹佐姜汁兼虛參以參加入脉或虛大數無力嘔吐

証據

清涎及冷沫胃虛不能容穀食聞食即嘔食反出入

參理中最為良丁香附子加亦得脉滑有力症不虛

証據

東垣語

胃滿按之痛愈劇合用朴實與二陳此謂中焦之嘔

從乎積

辨吐衄

熱厥吐衄必多神情清楚脉形和隨生隨吐無煩躁瀉其濕熱勿蹉跎厥陰傷寒屬風木吐重兼吐水清綠手足厥冷煩躁甚烏梅丸義君須讀

辨汗

虛汗須分陰與陽陽虛自汗補其衛

其人素虛或勞傷或大病後膝

理虛陽不能衛外而為固則自汗宜用參芪五味苓木甚則加桂附如乾姜半夏陳皮開達之藥皆不可用盜汗歸之陰氣虛參歸甘地從其類
人卧則血歸于肝陰虛而

不能爲守則盜汗宜參苓芪
木五味歸芍生熟地之類
惟有陽明邪併來熱氣

薰蒸毛竅開汗出溱溱常不止但宜涼解得和諧有汗

心家血液之汗太陽津液之汗俱不可出惟陽明水
穀之汗雖出無害故陽症傷寒熱氣薰蒸毛竅開發
溱溱而自出亦猶滾湯貯于器中熱氣上蒸而外濕
也若汗不出熱氣不得泄必鬱而發黃卽宜用清涼
以解其熱而汗自止
更有傷寒病久無汗出大劑參
不必用止汗之藥

芪柴桂合頓然出汗退其熱景岳書中亦曾說

辨譫妄

譫語是多言皆因胃汁乾就中譫語有實象譫字从

巖侃侃然旋轉風輪難自主纔呼李四便張三鄭聲
氣短神蕭索鄭重頻煩不厭復一樣逢人講話多不
曾說南又道北設使讖與鄭大半屬無稽是則名爲
妄虛實皆有之若夫似睡非睡間隱隱躍躍如交談
此爲獨語未全亂各從脉症細詳參

辨面目赤

面目赤有三須從脉症參陽氣鬱於表辛涼可散焉
裏熱薰於上白虎及黃連無根火外浮此是內真寒

八味生脉煎冷飲假對假兮古所傳

辨下利

下清穀者爲虛寒下清水者爲實熱惟有膿血稀漉
和汁沫此三件中細詳別假如作嘔不食兮腹痛喜
按心恍惚而煩兮或動悸與頭眩燥而不欲飲兮頭
眩耳鳴而口淡後重逼迫兮旣解而仍不減脉弦數
而虛大兮皆虛寒之外現苟脉症之反是兮卽實熱
之証驗

辨厥

手足冷時爲四逆厥者其冷過肘膝伸景傷寒俱禁汗無論陽厥與陰厥陽厥是傳經病自三陽并入陰熱極必兼勝化行還有始熱終寒因藥誤也能轉入陰寒路執定傳經亦是錯陰厥是直中喻氏中寒論當誦寒邪斬關直入來急救真陽休夢夢還怕熱邪深入血頓然厥冷身無熱君不見吞痧樣子忌熱湯不比中寒一例說摠之脉症要詳叅莖草拈來生殺

間陽厥譫渴陰吐涎陽者身輕陰者蹠復看其人唇
爪甲青紫爲熱青黑寒又有痰厥食厥和尸厥病久
陰陽二氣虛亦厥各等各樣在準繩步步須求脉症
合

辨腹痛

腹痛是虛喜揉按虛者必寒病涉陰脉遲緩兮或虛
大諸多虛象察其因理中桂附可施行熱者面黃澤
加以長滑脉宜用黃連苦清熱少佐姜萸亦相得更

有欲嘔不嘔腹痛多寒熱其如錯雜何黃連湯內乾

姜桂好共參甘兩下和食痛應消食難在虛寒兼食

積學士溫脾法可宗許學士有溫脾湯見本事方化爲煎法尤熨

貼有虛寒之人患腹痛服溫補藥而相安時止時作痛仍不解甚則利清水或白沫此虛中有實或先

有宿食在腸不會去或病中腸胃虛不能運化所食之物停于腸中卽一二塊宿糞亦能作楚宜用溫補

藥煎好去渣入大黃一錢不甚虛者可加一錢五分滾四五沸服之宿食自下正氣不傷而病隨愈此屢

試屢驗之妙法也蟲痛面黃吐涎沫食酸卽安甜卽劇虛實

寒熱要分曉殺蟲方中求配合氣痛因鬱惱必連胃

腕與兩脇病久人必虛滋補兼疏鬱痛不可近者按
之濡軟爲畜血不比硬滿爲熱結重則桃仁承氣湯
輕者宣通微下奪別有吞痧一症現濕熱薰蒸邪變
幻急刺委中出血良磨服玉樞丹亦善最怕是三陰
寒症認爲痧不飲溫湯飲冷茶亂進丹丸并放刮臨
危空自悔前差

辨脈脫

六脈俱脫者大命垂危矣

神昏脈脫者死神
清脈脫者亦死

通脈四

逆急服之還怕脉因暴出死但得脉來微續生更需
附子四五枚人參小半斤周時服盡休間斷隨進米
粥始回春參力偶不繼前功必盡棄平時無學力到
此滋疑懼每見虛寒之極服溫補躁亂不寧嘔且吐
此爲藥力尙未全切莫心疑換別路大約三陰病症
露危劇急則六日或三日緩則行期十二日幸而君
火未全衰反見舌乾等症出更須姜附助其陽漸得
陽回舌生液若見舌乾投涼劑壞乃百年人壽事起

手果然認得真斷不朝三與暮四君不見景岳全書
用法精十補一清巧相濟又不見嘉言寓意重叮嚀
陰症轉陽必自愈濟困扶顛道在斯一有游移便錯
去更有虛寒服藥來溫補不安涼適意兩寒相得從
其類正氣敗壞決不治至于實熱失汗下脉伏似脫
君休怕大承十棗用卽安神氣分明現真假須知實
熱治可緩涼瀉一投撥便轉不比虛寒救濟難仁術

全憑思與辨